

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON

KANTONALNI SUD U TUZLI

Broj: 003-0-Su-26-000 056
Tuzla, 24.02.2026. godine

Na osnovu člana 31. stav 1. Zakona o sudovima u Federaciji Bosne i Hercegovine ("Službene novine FBiH", broj: 38/05, 22/06, 63/10, 72/10-ispr., 7/13, 52/14 i 85/21), člana 8. tačka j) Pravilnika o unutrašnjem sudskom poslovanju ("Službeni glasnik BiH", broj: 66/12, 40/14, 54/17, 60/17 — ispravka, 30/18, 83/22), u vezi sa članom 14. stav 1. Zakona o zaštiti ličnih podataka („Službeni glasnik Bosne i Hercegovine” broj 12/25), u postupku implementacije Zakona o zaštiti ličnih podataka, predsjednik Kantonalnog suda u Tuzli donosi sljedeća:

PRAVILA PRIVATNOSTI

Cilj Pravila privatnosti Kantonalnog suda u Tuzli u skladu sa članom 14. Zakona o zaštiti ličnih podataka (u daljem tekstu Zakon), je da svim osobama čije lične podatke obrađuje pruži osnovne informacije o navedenoj obradi na transparentan način.

1. Pravni osnov za obradu ličnih podataka

Vaše lične podatke Sud obrađuje u skladu sa članom 8. stav 1 . tačka c) i e) Zakona, izvršavajući svoje pravne obaveze i ovlaštenja.

2. Svrha obrade ličnih podataka

2.1. Vaše lične podatke Sud obrađuje ispunjavajući svoje pravne obaveze u skladu s članom 8. stav 1. tačka e) Zakona u svrhu:

- izrade statističkih, strateških i drugih analitičkih dokumenata,
- odgovora na zahtjeve za slobodan pristup informacijama,
- evidencije stranaka, njihovih zakonskih zastupnika i punomoćnika, notara i drugih osoba koje se evidentiraju u informacijski sistem za automatsko upravljanje predmetima (CMS),
- upisa podataka u druge evidencije koje Sud vodi na osnovu zakona,
- zapošljavanja u Sudu,
- izrade ostalih dokumenata u okviru realizacije naloga utvrđenih od strane Visokog sudskog i tužilačkog vijeća Bosne i Hercegovine.

2.2. Vaše lične podatke Sud obrađuje na osnovu legitimnog interesa iz člana 8. stav 1. tačka f) Zakona u svrhu:

- učestvovanja sudija, stručnih saradnika, državnih službenika, namještenika i drugih zaposlenika Suda na edukacijama i predavanjima,
- učestvovanja drugih osoba koje nisu zaposlenici Suda, u slučajevima kada Sud organizuje edukacije, predavanja ili slične aktivnosti.

3. Prava nosilaca podataka u vezi sa obradom ličnih podataka

U skladu sa Zakonom o zaštiti ličnih podataka, nosioci podataka, uz izuzetke propisane posebnim zakonom, imaju sljedeća prava:

- **Pravo na pristup ličnom podatku** - u okviru ovog prava mogu se tražiti informacije o svrsi obrade, kategoriji ličnog podatka koji se obrađuje, predviđenom roku u kojem se čuva lični podatak, primocu ili kategorijama primalaca kojima je lični podatak otkriven ili će biti otkriven. Pristup ličnom podatku može biti ograničen samo u slučajevima kada je posebnim zakonom propisano ograničenje.
- **Pravo na ispravak ličnog podatka** - pravo zahtijevati ispravljanje ili dopunjavanje netačnog ličnog podatka ako podatak nije tačan i potpun. U zahtjevu navesti šta nije tačno i potpuno te u kojem smislu bi trebalo navedeno ispraviti te dostaviti potrebnu dokumentaciju u prilog svojih navoda.
- **Pravo na prigovor** - pravo u svakom trenutku podnijeti prigovor kontroloru podataka na obradu ličnog podatka u skladu s članom 8. stav 1. tačka e) ili f) Zakona, uključujući profiliranje utemeljeno na tim odredbama.
- **Pravo na brisanje** - ako lični podatak više nije potreban za svrhu za koju je prikupljen, ako je nosilac podatka povukao saglasnost na kojoj je obrada utemeljena, ako je nosilac podatka uložio prigovor na obradu u skladu s članom 23. stav 1. Zakona i ne postoje zakonski razlozi za obradu ili je nosilac podatka uložio prigovor na obradu u skladu s članom 23. stav 2. Zakona, ako je lični podatak nezakonito obrađen, ako ne postoje drugi pravni osnovi za obradu podatka.

Izuzeci za ostvarivanje prava na brisanje - radi ostvarivanja prava na slobodu izražavanja i informisanja, radi poštivanja zakonske obaveze kojom se zahtijeva obrada propisana posebnim zakonom, a koja se primjenjuje na kontrolora podataka ili radi izvršenja zadatka koji se obavlja u javnom interesu ili u izvršenju službenih ovlasti dodijeljenih kontroloru podataka, u svrhe arhiviranja u javnom interesu, u svrhe naučnog ili historijskog istraživanja ili u statističke svrhe u skladu s članom 56. stav. 1 Zakona, u mjeri u kojoj je vjerovatno da se pravom iz stava 1. može onemogućiti ili ozbiljno ugroziti ostvarivanje ciljeva te obrade ili radi postavljanja, ostvarivanja ili odbrane pravnih zahtjeva.

Za ostvarivanje svojih prava nosioci podataka se mogu obratiti ovom Sudu putem kontakt podataka navedenih u ovim Pravilima.

4. Sigurnost ličnih podataka

Podaci se obrađuju tako da se osigurava odgovarajuća sigurnost ličnih podataka, uključujući i zaštitu od neovlaštene ili nezakonite obrade i od slučajnog gubitka, uništenja ili oštećenja primjenom odgovarajućih tehničkih i organizacionih mjera zaštite. U cilju zaštite lica i imovine, kao i obezbjeđenja sigurnosti prostora, u Kantonalnom sudu u Tuzli postoji videonadzor, koji se vrši u skladu sa Zakonom o zaštiti ličnih podataka BiH i drugim pozitivnim propisima.

5. Korištenje kolačića i objava sadržaja na web stranici

Objavljivanje sudskih odluka/presuda i informativnog sadržaja na web stranici suda vršit će se u skladu sa važećim zakonima, poštujući princip transparentnosti rada sudova, uzimajući u obzir javni interes, pravo na zaštitu privatnosti i zaštitu ličnih podataka, te zaštitu interesa maloljetnika, svjedoka i oštećenog.

Na našoj službenoj internetskoj stranici koriste se obavezni, odnosno tehnički kolačići (cookies). Ti kolačići su male datoteke koje omogućavaju ispravan rad internet mjesta i ne možemo ih isključiti, te za njihovo korištenje ne trebamo vašu saglasnost. Obavezni kolačići ne pohranjuju nikakve informacije koje bi vas mogle identificirati.

6. Prenos ličnih podataka drugim kontrolorima podataka

Vaše lične podatke sud može dati drugim kontrolorima podataka ukoliko je to potrebno za izvršavanje zakonom propisanih obaveza. Vaše lične podatke sud daje pružaocima informatičko-komunikacijskih usluga sa kojima je zaključio ugovor i na način da se poštuju pravila postupanja sa ličnim podacima.

7. Vremenski period čuvanja ličnih podataka

Vaše lične podatke sud obrađuje u vremenskom periodu koji je potreban da se ispuni svrha njihove obrade. Nakon prestanka svrhe u koju su prikupljeni, Vaši lični podaci više se ne koriste, ali se čuvaju u arhivi onoliko vremena koliko obavezuju zakonski propisi o arhivskoj građi.

8. Izmjena Pravila privatnosti

Sud zadržava pravo izmjene i dopune ovih Pravila privatnosti u skladu sa izmjenama zakonskih propisa ili u skladu sa praksom. Sve izmjene će biti objavljene na web stranici suda.

9. Podaci o službeniku za zaštitu ličnih podataka

Adisa Alić, stručna saradnica za odnose s javnošću Kantonalnog suda u Tuzli
e-mail: adisa.alic@pravosudje.ba
telefon: 035/307-100

Osnovna uloga službenika za zaštitu ličnih podataka je davanje savjeta i preporuka o obradi ličnih podataka rukovodstvu i zaposlenicima Suda koji rade na poslovima obrade ličnih podataka, te nosiocima ličnih podataka čiji se lični podaci obrađuju od strane Suda.


10. Kontakt informacije suda

Kantonalni sud u Tuzli, Maršala Tita 137, 75 000 Tuzla

Tel: 035 307-100

Fax: 035 307-111

e-mail: ksud-tuzla@pravosudje.ba



Predsjednik suda
dr. sc. Muhamed Tulumović